

Meeqqatta inuunerup aqputaani unammillernarsinnaasut pitsaanerusumik anigornissaanut qanoq eqqarsartaatsikkut nukittunissaanik tuniorarsinnaanerigut, oqallisissiatut siunnersuut.
(Inatsisartunut ilaasortaq Nivi Olsen, Demokraatit)

Akissuteqaat

(Meeqqanut, Inuusuttunut, Ilaqutariinnut Peqqissutsimullu Naalackersuisoq)

Inuiaqatigiinni ajornartorsiutini pingaaruteqarnerpaat ilaannik ersarissaanermut Nivi Olsenimut Demokraatineersumut qujanaq. Inuusuttut eqqarsartaatsikkut peqqissusaat pillugu nalunaarusiap ilisimariikkagut takutippai: imigassamik atornerluineq, sumiginnaaneq imminullu toquttarneq annertuallaartoq. Allatut oqaatigalugu annikillisaavigisariaqakkatsinnik.

Sumiginnaaneq, nakuuserneq aamma angajoqqaat peqanngikulasut meeqqat eqqarsartaasiisa nukittussusaannik innarleeqataapput. Nuannaarutigaa inuiaqatigiinni misissuinerup nutaajunerpaap pitsanngoriaateqartoqarsimaneranik takussutissiimmat: angerlarsimaffini nakuusernarnerit, atornerluisarnerit imigassartortarnerillu amerliartorunnaarput. Tamanna pitsanngoriaat attatiinnassavarput. Naalackersuisut meeqqat uani ukiumi inunngortut tamaasa atornerlunneqaratik peroriartornissaat anguniagaraat. “Klinik Killiisa” ikiorsiissutit ilagaat, taanna qanittumi ammarpoq. Tassani inunnt atornerluisutut pissusilersuutilinnut katsorsaaviuvoq, taamaasilluni atornerluisoqaqqinnissaanut aarlerinaat minnerulissaaq.

Meeqqat inuusuttullu eqqarsartaatsikkut peqqissusaat pillugu nalunaarusiap sunik pisariaqartitsinerunersugut qujanartumik aamma takussutissiivoq: angerlarsimaffinni sinaakkutit pitsaasut toqqissisimanartullu, angajoqqaat qanilaartut ataatsimoornerillu peqqinnartut. Naatsumik oqaatigalugu: pissutsit meeqqap eqqarsartaatsikkut nukittussusaanik pitsaassusaanillu iluaqusiisut.

Meeqqat inuusuttullu eqqarsartaatsikkut nukittussusaat pitsaassusaallu angerlarsimaffianniit peroriartorneranniillu aallaaveqarput. Angerlarsimaviinnaanngilaq, kisiannili meeqqap peroriartornerani sumiiffigisami inuiaqatigiit sunneeqataasut tamarmik. Nunarsuarmi allani oqartoqartarpoq “meeraq perorsassagaanni illoqarfik pisariaqartinneqartartoq”. Allatut oqaatigalugu sumiiffigisami ataatsimoornerit meeqqap eqqarsartaatsikkut peqqissusaanut annertuumik pingaaruteqartoq. Angajoqqaat soorunami pingaaruteqartuupput, kisiannili aamma akkaa-/angaakkut, ajakkut, aataa-/aanaakkut, ikinngutit, paaqqinniffinni perorsaausut, ilinniartitsisut, assammik arsartuni sungiusaasut allarpassuillu meeqqanut tamakkiisumik, peqqinnermik inuttullu nuannaarnissaannik ilusilersuillutillu ineriartortitseqataasuupput. Suminngaanneerluni misigissutsimut tunngatillugu ilaqutariinnut attuumassuteqarneq pingaaruteqartorujussuuvoq. Ilaquttanut attaveqarnerup eqqarsartaatsikkullu pitsaasumik peqqissuunissap akornanni ataqatigiinneq eqqarsartaatsikkut peqqissuuneq pillugu nalunaarusiap nukittuutut isigaa.

Naalackersuisut meeqqanut inuusuttunullu pitsaanermik peroriartornissamut sinaakkutinik piunasaqaatinillu pilersitsileruttorput. Ukiumut Naalackersuisut iliusissatut pilersaarummik pilersitsissapput, taanna angerlarsimaffiup avataanut inissiisarnerit amerlassusaannik ikilisaanissamik, imminut toquttarnerit apparsarnissaannik, qanigisariinni nakuusernarnerup

annertusiartorneranik kiisalu Kalaallit Nunaata Meeqqat Pisinnaatitaaffii pillugit NP Isumaqatigiissutaata eqquutsinnissaanut pitsannorsaanissamik imaqartoq.

Naalakkersuisut uani marlussuit erseqqissaatiginiarpai: Inuiaqatigiit peqqinnerulernissaannut suliniut Inuuneritta III meeqqat toqqissimasumik peroriartornissaannut sinaakkutinik pilersitsivoq. Suliniut peqatigiinnissanit najukkamilu nukinnit tunngaveqarpoq. Tamatumunnga Qeqqata modelia assersuutaasinnaavoq, taanna angajoqqaanik, meeqqanik suliatiigullu ilinniarsimasunik najukkami suleqateqarnissamut tunngavissiisoq. Ataatsimoornernik peqqinnartunik peqarnerusariaqarpugut, assersuutigalugu peqatigisanik allanik timersoqateqarnerit. Kommuni timersornermi sammisaqartitsinernut tapeeqataanikkut ikiuisinnaavoq. Aamma angajoqqaat meeqqatik sunngiffimmi sammisaqartitsinernut nalunaartittarnissaat siuariartortinnissaannullu ikiortarnissaat erseqqissassallugu pingaaruteqarpoq. Meeqqagut allat peqatigitillugit timersoqateqartalernissaannut kajumissaartariaqarpagut. Tassani ataatsimut immikkullu namminneq ineriartortarmata. Meeqqat iluatsittumik akuliuffeqartarnissaat kissaatigaarput. Timersorneq sungiusarnissamut arlaannullu soqutigisamut pikkoriffeqalernissamut periarfissaavoq. Taamaasiornikkut imminut tatigisinnaassuseq qaffattarpoq eqqarsartaatsikkullu nukittunerulersitsisarluni.

Pinngortitamiilluni tarnimut peqqinnartog eqqarsartaatsikkut peqqinnissaq pillugu nalunaarusiap aamma erseqqissaatigaa. Inuiaqatigiit peqqinnerulernissaannut suliniut Taamaattumik meeqqat amerlanerusut ikinngutitik peqatigalugit timersorinnaalernissaat anguniarlugu, aamma meeqqat amerlanerusut, ilaqqatit ilagalugit sunngiffimmi sammisassaqalersinniarlugit pinngortitamukartarnissaat anguniarlugu sinaakkutinik pilersitsissaagut.

Alla atugarliornernit pinaveersaartitsivoq, allalu meeqqanik inuusuttunillu artorsarfinni ikorneqarnissamut pisariaqartitsisunik tigooqqaavoq. Oqarasuaatikkut siunnersuisarfik "Tusaannga" artorsaatit pillugit oqaloqatiginninnissamik periarfissiivoq. "Tusaannga"-mi ammasarfinnik sivitsuinikuuvoq kiisalu meeqqanut inuusuttunullu nioqqutinik nittarsaassinernik ersarinnerulersitsilluni. "Tusaannga" ulloq unnuarlu tamakkiisumik suli ammasalinngilaq, tamannalu kissaataagaluarpoq, taamaattorli tamanna anguneqarnissaanut suliniuteqarnissaq piviusorsiorpalaartuuvoq. Tamatuma saniatigut unnuami ajornerpaaffianiissinnaanerani oqaloqateqarnissamut, ikorneqarnissamut siunnersorneqarnissamut neqerooruteqartoqarsinnaavoq.

Uani suliassaqarfimmiittut suliniuterpasuit pitsaasut pillugit eqqartuisinnaaninnut periarfissinneqarama nuannaarutigaa. Meeqqat nuannaalernissaannut sinaakkutinik inunnillu tamanik siunissami qaammaqqusiisunik qanoq pilersitsisinnaanermut oqallilluarnissatsinnut qilanaarpunga.